

Un anochi inolvidable den Paraiso Organico na Jan Flemming



Mas o menos 18 aña pasa Padu del Caribe a presenta na Bon Bini Festival den compania di Minister Lily Beke y mi a wordo presenta cu un cuadro pinta pa Padu pa mi colga den oficina.

For di e dia siguiente te awe e cuadro ta colga den oficina.

E atardi ey, sinta pariba di museo historico, un mucha muher di 6 aña di edad a cay sinta band'i mi y el a puntra mi: **"Bo sa ki con bo a ricibi e regalo ey?"**

Mi a keda pensa un rato y e mucha a sigui: **"Esey ta pasobra bo ta wordo aprecia. Esey mi mama a siña mi"**. Mi nunca a pensa asina leu prome cu esey, y for di e dia ey mi a siña tambe pa aprecia cada **"cariño"** cu wordo entrega na mi persona, chikito of grandi.

Tur ora mi ricibi un reconocimiento asina, mi ta corda riba e mucha muher chikito aki.

Mi a ricibi e premio **"Cosecha di Cultura"** di **Fundacion Parke Curazon Nobo** durante un actividad navideño sumamente bunita na **"Paraiso Organico"**. For di momento cu mi a yega te ora cu mi a bay mi a ricibi un atencion bunita di tur esnan involvi y hasta a lubida di bay goza di mi sopi y stoba cu tabata spera riba mi. Trabao tabata mucho den mi cabez, mi ta kere.

Lagami conta di e lugar mes. **Paraiso Organico** ta un cunucu unda ta planta y cosecha berdura y tambe fruta. Prome cu bo yega na e cunucu mes tin un tereno habri unda a pone e tentnan y stulnan y dilanti tur esaki na un subida cu algun baranca rond dje, tabata tin e escenario. Pa duna un descripcion poco loco lo mi bisa cu tur cos tabata como si fuera bo ta den un dam.

Un biento fresco dushi tabata pasa eynan, y bo ta sinti admira e streanan, e nubianan y goza di locual ta pasando riba e stage. Tur esaki mey mey di un publico alegre cu a anima cada un di e artistanan cu a presenta riba escenario.

Mi tin cu bisa cu e lugar aki ta un di e lugarnan mas **DUSHI den aire liber** cu mi a experiencia den e 60 aña cu mi ta presenta shownan of atende na shownan. Mi favorito tabata **Ser'i Noka "tempo di su tempo"** y di bario, **Centro di Bario Tanki Leendert y CBBrazil**, pa nan ambiente familiar y nan publico di bario.

Un palabra di pabien ta bay na **Sra. Ailene Croes** cu a dirigi e show na un manera formidable. E prome presentacion tabata di **"Hobenan cu e luz di mundo"** bao guia di **Marlene Maduro**. Esaki tabata e prome biaha cu mi a hayami confronta cu un grupo di baile cu ta balia riba **teman musical gospel of religioso**. Berdad ta cu mi a goza cada un di nan bailenan, nan movecionnan riba tononan di e cancionnan y e refleho riba cara di cada un di e bailarinanan bisti na blanco. Di mi parti nan por a sigui balia 10 of mas cancion y lo mi a

goza di cada un. Cada frase di e cancion tabata wordo interpreta cu nan movecionnan y nan mannan y curpa.

Despues mi a hayami cu e grupo **"Streanan di Paz"** bao direccion di **Bertha Wolff**. E grupo aki mi a conoce durante concurso di aguinaldo y cu nan a bari casi cu tur premio na Piedra Plat den Entertainment Center 3 aña pasa. Esnan cu a forma parti tabata e hobennan **Alysa Brete, Jaydiene Croes, Sjerry Paesch, Fridelaine Lopez, Zarel Yarzagaray, Jelitz Croes y Bertha Wolff** tambe. Varios ta muchanan cu mi a conoce for di chiquito den varios festival y cu awe a crece cu mi tin cu puntra mi mes **"ta e mes?"** y cu mi lo por topa diahuebs dia 29 di December atrobe den **Festival di Dande Infantil y Hubenil na Plaza Betico Croes**.

Loke mi a goza un mundo tabata **"e sorpresa"**. Ailene tabata calenta e publico cu **"e sorpresa"** cu lo yega den poco minuut. Minuutnan a pasa y nada di sorpresa. E prome sorpresa pa mi tabata cu **e sorpresa a resulta di ta un sketch teatral** cu Machi preparando su plato di Pasco bao di musica di e parang **"Piece of pork"** y di **Sonora Matancera cu Celia Cruz** cu **"Bin come Bin Lembe"** y Machi contando di **Santa Claus** di fantasia pa no kere aden. Pero ora un strea a luza na cielo y luz (di vuurwerk) a sende, **sigui pa un boooooom!!** Machi y tur hende a sali na careda pa mira **yegada di Santa Claus**. E di dos sorpresa pa mi tabata ora cu for di un hoki schuin dilanti stage, diripiente sonido a sali y e **"slee di Santa Claus"** cu e homber



santo riba dje, a sali dreña den publico.

Henter anochi mi a kere cu e casita ey ta vestuario y cu nan ta dreña di e parti patras pa cambia paña. Lugar, ta slee di Santa Claus tabata eyden y a sali ta core tambe. Santa Claus a parti mangel y huguete y saca masha portret cu grandi y chikito. El a balia tambe cu varios di e personanan presente.

Despues di esey tabata tin e presentacion na mi persona, y no a dura mucho cu mi mester a baha bay, pasobra nan a bin buscami caba y tabata 8 or pasa. Masha gana mi tabata tin pa keda, pa sigui presentacion di **Martha Maduro, Mariachi Perla di Aruba, Gaita Katatumbo y Badu** cu tabata riba programa. No solamente pa e presentacionnan aki pero mas bien pa e bunita di e anochi, e ambiente formidable y e agradable cu **Paraiso Organico** ta pa presentacionnan cultural asina.

Mi a tarda di bin cu esaki pasobra mi kier a papia cu **Michael, Bertha y Ailene**, pero no a logra ni un celular di nan y mi no kier a laga dianan pasa sin bisa nan **masha masha danki pa e anochi inolvidable** aki. **Jan Flemming** tabata **"great"** cu mi y eynan mi kier mira hopi evento cultural den 2017 **Bon Pasco y Feliz 2017** tur hende.

Juby Naar